

Kiko a pasa cu e ser humano? :Un analisis interesante di nos comunidad di pader Rudy Lampe

Den e edicion recien di 'Com-
prondiendo Bida' a Sali un
articulo interesante di Pader
Rudy Lampe cu ta analisa e

busqueda na inmortalidad di e ser humano. Siguiendamente un parti di e articulo : Inmortalidad, e soño di semper di e ser humano. Nos tur ta busca e chispa aki den nos, conciente of inconciente. Despues di e bida aki kiko? "Mi no sa, pesey miho mi gosa di e bida awe, sin pensa riba un mayan", hopi hende lo pensa.

Inmortalidad, ken lo no kier'e.

Sinembargo si nos wak nos mundo awendia, nos ta mas mortal cu nunca. Pa por compronde inmortalidad, nos mester cuminsa pa compronde nos realidad prome. Pa haya mas profundisacion riba e tema aki, nos a tene un conversacion ameno cu Pader Rudy Lampe.

Segun Pader Lampe nos ta bibando den un mundo di crisis di balornan. Reflehando riba e pregunta : 'Kiko a pasa cu ser humano?' esaki logicamente ta hiba nos na un analisis di nos comunidad ac-

tual. Pader Rudy Lampe ta bisa, "E sociedad actual ta den un crisis grandi di balornan," esaki ta refleha den nos estadisticanan. Na Aruba tin 60% di matrimonionan ta caba den divorcio. E di dos indice ta e aumento di criminalidad, nos tin mas violencia, atraco, ilegalidad, delitonan di droga. E di tres indicador ta e cantidad di mucha cu ta nace pafor di matrimonio of bibando cu un padrastro den cas. Esakinan ta mensajenan cu ta bisa nos cu e base di nos sociedad cu ta e famia ta den un crisis. "Nos Sociedad ta cayendo for di otro, desintegrando," Pader Rudy ta bisa.

Awendia nos ta midi exito a base di placa. "Dicon nos a yega asina leu? Dor cu nos sistema ta basa riba ganashi di placa. Ki ora bo ta exitoso? Ki ora bo ta haya respet y reconocimiento? Ora bo tin placa," segun Pader Lampe.

Nos a cambia nos balornan humano pa balornan materialista y individualista. Esaki ta basa riba un historia empresarial cu ta promove e balor materialista. E economia no t'ey pa sirbi e hende, pero e hende tin cu sirbi e economia. Tambe nos sociedad ta enfa-

tisa e exito individualista y esaki hopi bes ta bay a costo di otro. Nos ta wak cu e mentalidad individualista aki a penetra te hasta den e seno di famia. Awendia hopi famianan ta kibra pasobra un di e partnernan no por cumpli cu nan caprichonan den nan famia y ta dicidi cu e ta bay, e ta divorcia, sin wak e consecuenecianan.

Nos sociedad ta basa riba divorcio. Nos por wak e divorcio aki tambe entre politica y etica. Politiconan hopi bes no ta drenta politica pa sirbi un pais y su pueblo, pero pa nan mes por enrikece nan mes. Nos por wak e divorcio aki tambe entre enseñansa y etica, cu no ta dirigi riba formacion, pero mas bien riba deformacion di e ser humano, desde cu nan ta chiquito.

E sociedadnan rond di mundo a perde nan sentido humano. No ta na Aruba so esaki ta tumando lugar, e ta algo global. Pero, nos tin cu realisa si cu un dia e lo spart for di otro, pasobra e no por sigi asina pa semper. Tur cos tin su limite. Te aki un parti di un articulo cu por pone nos pensa hopi di e forma cu nos ta hiba nos bida.